

শঙ্খা

BANGLADARSHAN.COM  
অক্ষয়কুমার বড়াল

# উপহার

সুহৃদয়

শ্রীযুক্ত প্রমথচন্দ্র কর

করকমলেশু

সে দিন-বর্ষার দিন, অতীব দুর্দিন।

অতি অন্ধকার ধরা,

আকাশ জলদে ভরা,

ঝরিছে মুষল-ধারা-বিশ্রাম-বিহীন;

বিজলী জুলিয়া উঠে,

কড়-কড় বজ্র ছুটে,

আছাড়ে করকা-শিলা-ধ্বংস সম্মুখিন

দাপটে ঝাপটে বায়ু

ছিঁড়িছে বিশ্বের স্নায়ু-

পিচ্ছিল গন্তব্য-পথ, কর্তব্য কঠিন।

ভীষণ অদৃষ্ট-রণ-সম্মুখে বিনাশ!

ফিরে' চাই ধরা পানে-

আঁধার ঙ্গকুটী হানে,

ঝটিকা ঝাপটে আনে তীক্ষ্ণ উপহাস।

আকাশের পানে চাই-

দেবতার চিহ্ন নাই,

কুণ্ডলিছে অন্ধকার-গাঢ় নিরাশ্বাস!

পদে পদে উঠি পড়ি,

দেখি,-তুমি করে ধরি'

দিতেছ হৃদয় ভরি' মমতা বিশ্বাস!

বিগত বরষা; আজ তুফানের শেষে

এনেছি এ হৃদি-শঙ্খ,

(থাক্ বালু, থাক্ পক্ষ;)

BANGLADARSHAN.COM

আগ্রহে কম্পিত-বক্ষে-বড় ভালবেসে!  
আমি ক্ষুদ্র, আমি দীন-  
সে যে জীবনের ঋণ!  
স্মরিত বিগত দিন-লও, ভাই, হেসে।  
সৌভাগ্য-সম্পদ সহ  
তার স্নেহশিস্ লহ-  
দেবতায় অহরহ  
ডেকেছিল যে তোমার মঙ্গল-উদ্দেশে।

BANGLADARSHAN.COM

## হৃদয়-শঙ্খ

তুচ্ছ শঙ্খসম এ হৃদয়  
 পড়িয়া সংসার-তীরে একা-  
 প্রতি চক্রে আবর্তে রেখায়  
 কত জনমের স্মৃতি লেখা!

আসে যায়-কেহ নাহি চায়,  
 সবাই খুঁজিছে মুক্তামণি;  
 কে শুনিবে হৃদয়ে আমার  
 ধ্বনিছে কি অনন্তের ধ্বনি!

হে রমণী, লও-তুলে' লও,  
 তোমাদের মঙ্গল-উৎসবে-  
 একবার ওই গীতি-গানে  
 বেজে' উঠি সুমঙ্গল রবে!

হে রথী, হে মহারথী, লও,  
 একবার ফুৎকার' সরোষে-  
 বল-দৃষ্ট, পরস্ব-লোলুপ  
 মরে' যাক্ এ বজ্র-নির্ঘোষে!

হে যোগী, হে ঋষি, হে পূজক,  
 তোমরা ফুৎকার' একবার-  
 আল্হতি-প্রণতি-স্তুতি আগে  
 বহে' আনি আশীর্বাদ-ভার।

# কবি

আমরা স্বপনে মাতি,  
জগতে স্বরণে গাঁথি,  
গায়ি নিত্য নব গান;  
কখন সাগর-তীরে,  
কখন ভূধর-শিরে—  
কোথাও নাহিক স্থান!

আমরা জানি না ছল,  
মানি না পাশব বল,  
নাহি চাই ধনজন;  
ল'য়ে সুখহীন সুখ,  
ল'য়ে দুখহীন দুখ  
সহি কত অনশন!

আমরা চাহি না কিছু,  
কাল পড়ে' রয় পিছু,  
ধরণী লুটায় পায়;  
আমাদের অনুরাগে  
জগতে মানব জাগে—  
চির-দেব-মহিমায়!

আমরা জীবন গড়ি,  
মরণে মধুর করি,  
নিরাশায় দেই আশা;  
শিশুরে হৃদয়ে টানি,  
রমণীরে দেবী মানি,  
যুবজনে ভালবাসা।

পীড়িতের লাগি' যুঝি,  
পতিতের ব্যথা বুঝি,  
সচেতন রাখি দেশ;

BANGLADARSHAN.COM

আমরা দেশের প্রাণ,  
প্রীতি, স্মৃতি, ধ্যান, জ্ঞান;  
আমরা আদি ও শেষ।

BANGLADARSHAN.COM

## হৃদয়

যে মন্দির পানে চাহি' স্বতঃ মনে হয়,—

এ নহে মর্ম্মর-স্তূপ, শিল্পীর হৃদয়;

সে-ই দেব-গেহ।

যে মূর্ত্তি হেরিয়া চিত্ত আনন্দে বিহ্বল,—

নিকষে শিল্পীর প্রাণ করে ঢল্-ঢল্;

সে-ই দেব-দেহ।

যে গীতে ঝঙ্কারে সুরে গায়কের মন,—

কত-না অব্যক্ত আশা, অস্ফুট ক্রন্দন;

সে-ই দেব-গীতি।

যে কাব্যে বিকাশে ছন্দে কবির অন্তর,—

জীবনে জাগিয়া উঠে জন্ম-জন্মান্তর;

সে-ই দেব-প্ৰীতি।

কাব্য নয়, চিত্র নয়, প্রতিমূর্ত্তি নয়,

ধরণী চাহিছে শুধু,—হৃদয়—হৃদয়।

BANGLADARSHAN.COM

# প্রতিভার উদ্বোধন

বিধাতার নিষ্কাম হৃদয়ে

চমকিল প্রথম কামনা;

চমকিল নব আশা-ভয়ে

আনন্দের পরমাণু-কণা!

অসহ্য এ নবজাগরণ-

আকুল ব্যাকুল চিন্তাকাশ!

স্পন্দন-কম্পন-আলোড়ন-

এ কি আশা, না এ অবিশ্বাস?

অপেক্ষার এ কি বেলা-

অপেক্ষায় হৃদয় অস্থির;

গড়িছে-ভাঙ্গিছে বারবার-

এ কি খেলা মুগ্ধা প্রকৃতির।

বারবার মুছেন নয়ান,

ক্রমে ছায়া-ক্রমশঃ আভাস;

নাহি জ্ঞান, নহেন অজ্ঞান-

সহসা জগৎ পরকাশ।

পড়িল গভীর দীর্ঘশ্বাস,

এ কি দুঃখ-না এ সুখ অতি!

বাস্তব-না কল্পনা-বিকাশ?

কামনা-বাসনা মূর্তিমতী।

বিস্ময়-বিহ্বল মহাকবি

চাহিয়া আছেন অনিমিখে-

সম্মুখে ফুটিছে নব রবি,

তারকা ফুটিছে দশ দিকে!

BANGLADARSHAN.COM



মহাশূন্য পরিপূর্ণ আজি  
সুকোমল তরল কিরণে!  
ঘুরে গ্রহ-উপগ্রহরাজি  
দূরে-দূরে বিচিত্র-বরণে!

গ্রহ হ'তে গ্রহান্তরে ছুটে  
ওঙ্কার-ঝঙ্কার অনাহত!  
পঞ্চভূত উঠে ফুটে' ফুটে'  
রূপ-রস-গন্ধ-স্পর্শে কত!

ছন্দে বন্ধে যতি-গরিমায়  
চলে কাল ললিত-চরণে!  
অন্ধশক্তি পূর্ণ সুষমায়,  
চেতনার প্রথম চুম্বনে!

নীলবাসে ঢাকি' শ্যামদেহ  
শশিকক্ষে ভ্রমে ধরা ধীরে;  
কত শোভা, কত প্রেম-স্নেহ,  
জলে স্থলে প্রাসাদে কুটীরে

চাহে উষা-চকিত নয়ন,  
ফুলবাসে বায়ু সুবাসিত;  
উঠে ধীর বিহগ-কূজন-  
সৃষ্টি 'পরে স্রষ্টা বিভাসিত।

সমাপ্ত বিধির সৃষ্টি-ক্রিয়া,  
অসমাপ্ত সৃজন-কল্পনা-  
এস তবে, এস বাহিরিয়া  
চিত্ত হ'তে, চিন্তায়ী চেতনা।

এস, নিত্য-স্বরগ-স্বপন,  
রূপ-রস-শব্দ-অসীমায়-  
মর-জন্ম করিয়া লুপ্তন  
অমর সৌন্দর্য্য-মহিমায়!

BANGLADARSHAN.COM

ল'য়ে এস-সে আদি কল্পনা,  
সুখে দুঃখে মরণে নির্ভয়,  
সে অব্যক্ত আনন্দ-বেদনা,  
সেই প্রেম-অনাদি অক্ষয়

BANGLADARSHAN.COM

# প্রতিভার নিবর্তন

কেন এই শূন্য অনুভব?

কাতরে কাঁদিয়ে মনঃপ্রাণ।

কি অব্যক্ত যন্ত্রণার রব—

শ্বাসে শ্বাসে মরণ-আহ্বান।

কোন্ অমরীর দেবদেহ

ছিল মর্মে জড়িয়ে গোপনে—

দিয়া শোভা, দিয়া প্রেম-স্নেহ,

নাহি দিত বুঝিতে আপনে।

চলে' গেছে অলক্ষ্যে কখন—

কি চঞ্চল দেবতার প্রীতি!

এ কি সত্য—কল্পনা—স্বপন?

না এ কোন জন্মান্তর-স্মৃতি?

খুঁজিতেছি—আকুল নয়ন,

আলোকে জগৎ গেছে ভরি'।

কোথা প্রেম—স্নিগ্ধ আবরণ!

শূন্য হৃদি ধূ-ধূ করে পড়ি'!

কেন দুঃখ—আশা-ভাষা-হীন,

স্মৃতি-হীন বিরহ-হতাশ!

কোথা সেই যৌবন নবীন?

পড়িয়ে প্রৌঢ়ের দীর্ঘশ্বাস।

BANGLADARSHAN.COM



# প্রীতি

অতি অসহায় প্রীতি দাঁড়াইয়া পথ-ধারে,  
দিয়া হাসি, দিয়া গান, বরিয়া লহ গো তারে!  
নগর প্রান্তর ঘুরি',  
ত্যজি' কত রাজপুরী,  
কি পুণ্যের ফলে আজি এসেছে তোমার দ্বারে!  
হে দম্পতি, উঠ তুরা,  
ফুলে ভরে' গেছে ধরা,  
বিহগ ডাকিয়া সারা, কাঁপে আলো মেঘ-আড়ে।  
দেখ-দেখ আঁখি ভরি',  
কি স্বপনে, মরি মরি,  
ঘুমায়ে ঘুমায়ে বাছা হাসি-মুখে বাহু নাড়ে!

দ্বারে প্রীতি দাঁড়াইয়া, আগুসর'-আগুসর'!  
চেয়ো না-কয়ো' না এত, আদরে হৃদয়ে ধর!  
পদশব্দে চমকায়,  
দূর পথপানে চায়,  
পরশে কম্পিত কায়, ভুরু-ভঙ্গে জড়-সড়।  
ডাকিলে পলায় ত্রাসে,  
না ডাকিলে ছুটে' আসে,  
দিলে পথে ফেলে' যায়, না দিলে কাতর বড়!  
হে গৃহিণী, দীপ আনি,  
দেখ বধু-মুখখানি-  
হাসিতে মধুর অতি, রোদনে মধুরতর!  
এসেছে নূতন দেশে,  
কোলে তুলে' লও হেসে,  
ভালবেসে-ভালবেসে পরে আপনার কর!  
ছুটিছে ব্যথিত প্রীতি ক্ষোভে রোষে অভিমানে,  
সম্মুখে সহস্র অসি, কোন বাধা নাহি মানে।  
মরে যে ফুলের ঘায়,

BANGLADARSHAN.COM

মরণে না ভয় পায়,  
ভাঙ্গি' লৌহ-কারাগার প্রিয়জনে বুকে টানে!  
ঝরে রক্ত তনু বেয়ে,  
দেখ, কবি, দেখ চেয়ে—  
আছে চেয়ে অনিমিখে প্রিয়জন-মুখপানে।  
মুদে' আসে আঁখি-পাতা,  
পতি-পদে লুঠে মাথা,  
মরণ চরণ-প্রান্তে দাঁড়িয়ে বিহ্বল-প্রাণে!  
অতি অসহায় প্রীতি বসিয়া তটিনী-তীরে,  
পশ্চিমে রক্তিম রবি ডুবিতেছে ধীরে ধীরে।  
আলু-থালু রক্ষ কেশ,  
ধূলি-ধূসরিত বেশ,  
পাঞ্জুর কপোল-দেশ, আঁখি দুটা অন্ধ নীরে।  
দূরে ভেসে' যায় তরী,  
পড়ে মেঘ মেঘোপরি,  
পড়ে ঘন কালো ছায়া—জলে স্থলে তরুশিরে।  
নাহি গেহ, নাহি কেহ,  
শূন্য প্রাণ, জীর্ণ দেহ,  
তোমার মরণ-স্নেহ দাও, দেব, দুঃখিনীরে!

BANGLADARSHAN.COM

# শ্রী

দেবী,  
তোমার মধুর হাসে,  
তুচ্ছ ম্লান ছিন্নবাসে  
চকিতে জাগিয়া উঠে নিদ্রিতা অমরী!  
আলু-থালু কেশরাশ,  
মুখে হাসি, চোখে ত্রাস,  
লাজে টানে বক্ষোবাস আজীবন ধরি'।  
সেই চাঁদ আধ চায়,  
সেই ফুল ঝরে গায়,  
আলোকে আঁধারে সেই দূরে জড়াজড়ি!

তোমার কোমল স্পর্শে  
পাষণ মুঞ্জরে হর্ষে—  
সহস্র নয়ন 'পরে দাঁড়ায় উর্বরী!  
কিবা মুখ অভিরাম।  
কিবা কন্ধুকণ্ঠ-ঠাম!  
মূরছিয়া পড়ে কাম উরস পরশি'।  
কোথা উষা অচঞ্চল,  
নির্জন মন্দার-তল,  
কোথা মন্দাকিনী-জল-তরল আরসী!

তোমার করুণ শ্বাসে  
কাঁদে প্রাণ কি উচ্ছ্বাসে!  
জগৎ মুদিয়া আসে শুনে' সে বাঁশরী!  
সুর পায় কিবা সুর—  
আশা-ভাষা শত-চুর!  
মুক্ত-প্রাণ দেবাসুর সুধা পান করি'!  
ধরা ফুলে ফুলময়,  
যমুনা উজানে বয়,  
রমণী ত্বরিতে ধায় ভরিতে গাগরী।

BANGLADARSHAN.COM

তোমার নয়ন-রাগে  
কি নব-বসন্ত জাগে!  
মুঞ্জরিয়া উঠে দেহ, গুঞ্জরিয়া মন  
ক্ষুদ্র কথা, তুচ্ছ মতি  
লভে কি তড়িৎ গতি—  
যেন মূলা পরাকৃতি বেড়ে ত্রিভুবন!  
আপনে আপনি লিখে’  
চেয়ে থাকে অনিমিখে,  
জগতে চেতনা দিয়ে নিজে অচেতন!

দেবী,

তোমারি চরণ-মূলে  
আছি আমি বিশ্ব ভূলে’!  
আমারে না হেরে’ রাখা কাঁদে উভরায়!  
শকুন্তলা নিত্য আসি’  
হেরে মম রূপরাশি!  
রত্নাবলী লতা-ফাঁসী গলে দিতে যায়!  
মহাশ্বেতা আমা তরে  
চির ব্রহ্মচর্য্য করে!  
সাবিত্রী আমারে ধরে’ যমেরে তাড়ায়!

তোমারি বিরহে কাঁদি’  
মেঘে আমি কত সাধি,  
খুঁজি কত পদুবন, ডাকি দেবগণে!  
চাঁদে ফিরে’ ফিরে’ চাই,  
মলয়ে আশ্রাণ পাই,  
বাহুব্রমে ছুটে’ যাই লতা-আলিঙ্গনে!  
শত্রুধনু হেরি’ ক্রোধে  
ধরি ধনু দৈত্যবোধে;  
অর্ধ-বস্ত্র শনি-গ্রস্ত ভ্রমি বনে বনে।

মূর্ছান্তে চমকি’ তাই,  
বায়ু বলে নাই-নাই,



পতি-নিন্দা-শোকে সতী ত্যজেছে ভূতল  
স্কন্ধে ল'য়ে মৃতদেহ,  
বুকে ল'য়ে প্রেম-স্নেহ-  
ত্রিভুবনে নাহি গেহ-ছুটিছে পাগল!  
কালের কুটিল দিঠে  
পড়ে অঙ্গ পীঠে পীঠে-  
পতি-প্রেমে দেবী তুমি, পীঠে তীর্থস্থল!

বিরচি' জগৎ-মাঝ  
মমতার 'মমতাজ'-  
বুক-ভরা নিরাশায় স্বপন-রচনা!  
অশ্রু দিয়া, শ্বাস দিয়া,  
মনঃপ্রাণ নিঙ্গাড়িয়া,  
তোমারি প্রীত্যর্থ, প্রিয়া, তোমারি কল্পনা!  
সে তপস্যা ঘেরি' ঘেরি'  
ঘুরে তব স্মৃতি-চেড়ী,  
মরণ মধুর করি'-জীবন ছলনা।

BANGLADARSHAN.COM

# ত্রয়ী

জীবনের এ সঙ্গীত পবিত্র মহান্—  
প্রতিজনে করিতেছে সতত আহ্বান!  
তবু নর অন্যমনে  
তুচ্ছ সুখ-দুঃখ গণে,  
প্রাণ-পণে রুদ্ধ করি' নিজ মনঃপ্রাণ!  
ক্ষণ-তরে স্বার্থ ভুলি'  
হৃদি-শঙ্খ লহ তুলি',  
শুন, কি ওঙ্কার-ধ্বনি-বিশ্ব কম্পমান!  
কি ধীর গভীর শব্দ—  
ধরণী ধূসর স্তব্ধ,  
সুরনর থর-থর-নাহি পরিত্রাণ!  
মূর্ছিত মলিন ভানু,  
শ্লথ অণু-পরমাণু,  
বাজিছে পিনাকি-করে প্রলয়-বিষণ  
জীবনের এ সঙ্গীত পবিত্র মহান্।

১

জীবনের এ সঙ্গীত পবিত্র ভীষণ—  
ডাকিতেছে জনে জনে গর্জি' অনুক্ষণ!  
তবু নর, এ কি ভ্রান্তি,  
ল'য়ে ক্ষুদ্র কড়াক্রান্তি,  
ল'য়ে ক্ষুদ্র দ্বেষ গর্ব, সদা জ্বালাতন!  
যেন মত্ত দৈত্য সবে  
মাতিয়াছে রণেৎসবে—  
দেব-নর-রক্তে বিশ্ব রক্তিম বরণ!  
কুল-কুণ্ডলিনী মা গো,  
উঠ-উঠ, জাগো-জাগো,  
এস-এস সহস্রারে, রক্ষ' ত্রিভুবন!  
এস রণে, কপালিনী—

কালভয়-নিবারিণী!  
মুক্তকেশী, উলঙ্গিনী, পদে ত্রিলোচন!  
জীবনের এ সঙ্গীত পবিত্র ভীষণ।

২

জীবনের এ সঙ্গীত পবিত্র মধুর—  
বেহাগে আলাপে কার বাঁশরী সুদূর!  
আবেশে অবশ প্রাণ,  
মুদে' আসে দু' নয়ান,  
ঘুমে আলু-থালু ধরা-সোহাগে বিধুর।  
পাপিয়া ডাকিয়া সারা,  
যমুনা আপনা-হারা,  
কানন কুসুমে ভরা, পবন মেদুর।  
এ অলস-জাগরণে  
পড়িয়া পড়ে না মনে—  
দেখি-দেখি-দেখি-না সে বদন বঁধুর!  
আকুল ব্যাকুল আশা,  
কি পিপাসা-নাহি ভাষা!  
হৃদয় ভ্রমিছে কোথা-কোন্ স্বর্গ দূর  
জীবনের এ সঙ্গীত পবিত্র মধুর।

৩

জীবনের এ সঙ্গীত পবিত্র সুন্দর—  
প্রকৃতির অসংবৃত বক্ষঃ-নীলাম্বর!  
সুমেরু-চুচুক-পাশে  
সুকুমারী উষা হাসে;  
বিসর্পী হোমাগ্নি-ধূমে মরুত কাতর।  
তুষার, নীবার দলি'  
ঋষিকন্যা যায় চলি';  
চরে সরস্বতী-তটে কপিলা নধর।  
আহরি' সমিধ-ভার  
আসে শিষ্য সুকুমার;

যজ্ঞ-কুণ্ডে ঢালে হবিঃ ঋত্বিক ভাস্বর।

সোমগন্ধে সামচ্ছন্দে

নামিছেন কি আনন্দে

অরণ বরণ ইন্দ্র উজ্জলি' অম্বর!

জীবনের এ সঙ্গীত পবিত্র সুন্দর।

BANGLADARSHAN.COM

২

## প্রার্থনা

দুঃখী বলে,—‘বিধি নাই, নাহিক বিধাতা;  
চক্র সম অন্ধ ধরা চলে।’

সুখী বলে,—‘কোথা দুঃখ, অদৃষ্ট কোথায়?  
ধরণী নরের পদতলে।’

জ্ঞানী বলে,—‘কার্য আছে, কারণ দুর্ভেদ্য;  
এ জীবন প্রতীক্ষা-কাতর।’

ভক্ত বলে,—‘ধরণীর মহারাসে সদা  
ত্রীড়ামত্ত রসিক-শেখর।’

ঋষি বলে,—‘প্রব তুমি, বরণ্য ভূমান্।’

কবি বলে,—‘তুমি শোভাময়।’

গৃহী আমি, জীবযুদ্ধে ডাকি হে কাতরে,—  
‘দয়াময়, হও সে সদয়।’

BANGLADARSHAN.COM

# পিতৃহীন

এখনো নিদ্রিত, পিতা! এল সন্ধ্যা হ'য়ে,  
কত ক্ষণ ঘুমাইবে আর?  
করিবে না সন্ধ্যাহ্নিক? গঙ্গোদক ল'য়ে  
রাখিয়াছি শিয়রে তোমার।  
উঠ, দেখ চেয়ে, দেছি গবাক্ষ খুলিয়া,  
সূর্য্য ওই বসেছেন পাটে;  
মেঘ হ'তে মেঘে আলো পড়িছে চলিয়া,  
অন্ধকার জমিতেছে মাঠে।

সন্ধ্যা হ'ল-উঠ, পিতা। মন্দিরে মন্দিরে  
আরতির বাজিয়ে বাজনা।  
জ্বালিব কি দীপ?—জ্বলে কুটীরে কুটীরে;  
করিবে না গায়ত্রী-বন্দনা?  
বড় অন্ধকার গৃহ, পাইতেছি ভয়,  
উঠ, পিতা, কও-কথা কও।  
অন্যদিন কত পাঠ, কত গল্প হয়;  
তুমি ত কঠোর কভু নও।

কেন এ ঘর্ষর-ধ্বনি, কেন এ জ্রকুটী?  
কেন, পিতা, কেন হেন রোষ?  
সেই আমি আছি বসে' ল'য়ে ভাই দুটী,  
করি নাই আজ কোন দোষ।  
পদাঘাত? তাই কর-পুনঃ পদাঘাত?  
বড় বাজিয়াছে, পিতা, বুকো!  
বেজেছে তোমার পায়? বুলাব কি হাত?  
কও, পিতা, কও হাসি-মুখে।

এ কি, পিতা! কেন পদ তুষার-শীতল,  
কেন হেন নিঃশ্বাস সঘন?  
দিব কি উত্তাপ আমি? জ্বালিব অনল?

BANGLADARSHAN.COM

শীতে বুঝি করিছ এমন!  
এস, ভাই, বস' হেথা নিমেষের তরে,  
দীপ জ্বালি' শীঘ্র অগ্নি করি;  
এখনো হয় নি রাত, দিব ভাত পরে,  
কাঁদিস না, পায়ে তোর পড়ি!

পিতা! পিতা! কেন মাথা লুঠায় এমন?  
এ কি নব দেবতা-প্রণতি!  
এ কি মুখভঙ্গী-এ কি ঘূর্ণিত নয়ন!  
ক্ষমা কর, ভীত আমি অতি।  
কি করুণ-কণ্ঠে শিবা ডাকিছে বাহিরে-  
পেচকের কি তীব্র চীৎকার!  
কি চঞ্চল দীপ-শিখা-আঁকিছে প্রাচীরে  
কত মূর্তি-বিকট-আকার!

পিতা! পিতা! ঘুমালে কি? গৃহ অন্ধকার,  
আকুলি' উঠিছে প্রাণ ত্রাসে!  
আশে-পাশে ঘুরিতেছে শুভ্র বাস কার-  
রুদ্ধ গৃহে কেবা যায় আসে?  
এ কি নিদ্রা?-সর্বদেহ শীতল কঠিন,  
নাহি শ্বাস, না বহে ধমনী!  
এ কি মৃত্যু?-যে মৃত্যু মাগিতে প্রতিদিন?  
লভেছেন যে মৃত্যু জননী?

প্রভাতে ফিরিছে গৃহে স্বপ্নাতুর মত,  
গলে শোক-উত্তরীয় দোলে;  
প্রতিবেশী জনে জনে বুঝাইছে কত-  
দ্বারে এসে ডাকে 'পিতা' বলে'!

BANGLADARSHAN.COM

# বন্ধুর বিবাহ

১ম। কি কুহকী ফুলবাণ-

মধুময় কি সন্ধান!

কে জানে কখন মলয় বহিল-

কুয়াসা টুটিল, কুসুম ফুটিল,

বিহগ গায়িল গান!

শিহরিল দেহ, উথলিল স্নেহ,

জাগিল হৃদয়ে, কোন্ দূর গেহ,

কবে সেই প্রাণ-দান!

২য়। চারি দিকে চায় আকুল-হৃদয়,

হাসিতে বাঁশীতে ধরা মধুময়;

কার কথা যেন মনে হয়-হয়,

তবুও হয় না মনে!

পথ-পানে চেয়ে সে যেন এমনি

যাপিছে জীবন পল গণি' গণি',

চোখে কত কথা, বুকে কত ব্যথা,

কোলে মালা অযতনে-

তবুও হয় না মনে!

৩য়। এস, প্রিয়সখী, তিথি অনুকুল,

আশা-পিপাসায় প্রাণে কত ভুল!

কত গাহি গান, কত তুলি ফুল-

মজিয়া তোমার ধ্যানে!

সেই সুখে সাধে, সেই প্রেমে লাজে,

দাঁড়াও-দাঁড়াও এসে ধরামাঝে!

এস প্রতিপলে, এস প্রতিকাজে,

এস মনে, এস প্রাণে!

BANGLADARSHAN.COM



৪র্থ। ঘুচাও বিষাদ শোক পাপ তাপ,  
নর-জীবনের চির-অভিশাপ-  
তোমার প্রণয়-দানে!  
এস প্রেমময়ী, এস সুমঙ্গলে,  
ডাকিছেন মাতা ল'য়ে দুর্বাদলে;  
সখারা ডাকিছে গানে,-  
এস মনে, এস প্রাণে।

BANGLADARSHAN.COM

# সন্ধ্যা

দূরে-সুমেরুর শিরে আসে সন্ধ্যারাগী,  
সুনীল বসনে ঢাকি' ফুল-তনুখানি।

তরল গুণ্ঠন-আড়ে

মুখ-শশী উঁকি মারে;

সরমে উছলি' পড়ে কত প্রেম-বাণী!

নব-নীলোৎপল মত

আঁখি দুটি অবনত;

সম্বমে সঙ্কোচে কত বাধিছে চরণ।

পতির পবিত্র ঘরে

সতী পরবেশ করে-

হাতে সুবর্ণের দীপ, হৃদয়ে কম্পন!

নয়নে গভীর তৃপ্তি-

ক্ষীরোদ-সমুদ্র-দীপ্তি;

অধরে চন্দ্রিকা-হাসি-বিজয়-বিশ্রাম!

নিঃশ্বাসে মলয়াবেগ,

অলকে অলক-মেঘ,

শুক্রতারা-মুকুতার-নৃত্য অভিরাম!

আসে ধনী আখি-বিখি,

কপালে তারকা-সিঁথী,

সীমন্তে সিন্দুর-বিন্দু-দিনান্ত-তপন;

গুচ্ছে গুচ্ছে কালো চুলে

স্তম্ভ অন্ধকার দুলে;

দিগন্ত-বসনাঞ্চলে কত না রতন!

গলে নীহারিকা-মালা,

করে সপ্তঋষি-বালা,

রাশিচক্র-মেখলার কি দ্রীড়া মঙ্গল!

BANGLADARSHAN.COM

জলদ চরণ-তলে  
কাঁদিছে মঞ্জীরচ্ছলে;  
বনানী-বসনপ্রান্তে-চিত্র ঝল-মল!

অপূর্ব অপূর্ব দৃশ্য!  
সম্রমে প্রণমে' বিশ্ব,  
দেবতা আশিস্-ছলে বরষে শিশির।  
নদীমুখে কল-গীতি,  
সমুদ্র-হৃদয়ে স্থলীতি,  
অগুরু-চন্দন-ধূপে অলস সমীর।

ঘরে ঘরে দীপ জ্বলে-  
পুলিনে, তুলসী-তলে,  
যেন শত চক্ষু মেলে' হেরিছে ধরণী!  
মন্দিরে মঙ্গলারতি,  
বালা পুজে সন্ধ্যাসতী,  
পুরনারী ভক্তিভরে করে শঙ্খ-ধ্বনি।  
এস, প্রিয়া-প্রাণাধিকা,  
জীবন-হোমাগ্নি-শিখা!  
দিবসের পাপ-তাপ হোক হতমান!  
ওই প্রেমে-প্রেমানন্দে,  
ওই স্পর্শে, বাহু-বন্ধে,  
আবার জাগুক মনে,-আমি যে মহান,  
একেশ্বর, অদ্বিতীয়, অনন্য-প্রধান!

BANGLADARSHAN.COM

# আহ্বান

১

হের, প্রিয়া, এই ধরা—                      তরু-লতা-পুষ্প-ভরা,  
গিরি-নদী-সাগর-শোভনা—  
নগ্ন দেহে, মুক্ত প্রাণে                      চাহিয়া আকাশ-পানে;  
নাহি লজ্জা, নাহিক ছলনা।

হের, ওই মহাকাশ—                      ল'য়ে মেঘ রাশ রাশ,  
লইয়া আলোক অন্ধকার—  
কি গাঢ় গভীর সুখে                      পড়িয়া ধরার বুকে;  
নাহি ঘৃণা, নাহি অহঙ্কার।

শিরে শূন্য, পদে ভূমি,                      মধ্যে আছি আমি তুমি—  
কল্প-কল্প বিকাশ-বারতা!

আছে দেহ—আছে ক্ষুধা,                      আছে হৃদি—খুঁজি সুধা,  
আছে মৃত্যু—চাহি অমরতা!

আছে দুঃখ, আছে ভ্রান্তি,                      আছে সুখ, আছে শ্রান্তি,  
আছে ত্যাগ, আছে আহরণ;  
তুমি সাগরের প্রায়                      পারিবে কি ঝটিকায়  
উঠিতে পড়িতে আমরণ?

২

আজি করে কর দিয়া                      বুঝিছ আমারে, প্রিয়া?  
বুঝিছ কি মনঃপ্রাণ সব?  
নহে মৃত্যু, নহে শূন্য,                      নহে পাপ, নহে পুণ্য,—  
আত্মায় আত্মার অনুভব!

বুঝিছ কি এ আনন্দ—                      এত আলো, এত ছন্দ,  
এত গন্ধ, এত গীতিগান!  
কত জন্ম-মৃত্যু দিয়া,                      কত স্বর্গ-মর্ত্য নিয়া  
করি আজ তোমারে আহ্বান!

বিস্ময়ে-কাতর চক্ষে হের, এ কম্পিত বক্ষে  
কত শোভা-কত ধ্বংস, প্রিয়া!  
শত শত ভগ্ন স্তূপ- কি বিরাট-অপরূপ-  
জন্ম-জন্ম আশা-স্মৃতি নিয়া!

চিত্রে শিল্পে কাব্যে গানে মগন তোমার ধ্যানে,  
তুচ্ছ করি' কালের গরিমা!  
পাষাণে পাষাণে রেখা- তোমার প্রণয়-লেখা,  
মর জড়ে অমর মহিমা!

৩

আসে সন্ধ্যা মৃদু-গতি, আকাশ কোমল অতি,  
জল স্থল নিস্পন্দ নির্ঝাঁক,  
পশু পক্ষী গেছে ফিরে', ফুটে তারা ধীরে ধীরে,  
শান্ত ধরা-শ্লথ বাহু-পাক।

এস, এ হৃদয়ে মম, অস্ফুট চন্দ্রিকা সম,  
প্রেমে স্তব্ধ, স্নিগ্ধ করুণায়!  
ঢেকে' দাও সব ব্যথা, অসমতা, অক্ষমতা,  
জড়িয়ে-ছড়িয়ে আপনায়!

ল'য়ে প্রেম-সুধারশি এস দেবী, এস দাসী,  
এস সখী, এস প্রাণপ্রিয়া!  
এস, সুখ-দুঃখ-দূরে, জন্ম-মৃত্যু ভেঙ্গে-চূরে,  
সৃষ্টি-স্থিতি-প্রলয় ব্যাপিয়া!

# সদ্যোজাতা কন্যা

১

কে তুই রে সুধারাশি পড়িলি ঝাপায়ে  
প্রিয়সীর কোলে!

সমুদ্র আকুল-হিয়া, কোটি বাহু আশ্ফালিয়া,  
তোরে কি ডাকিতেছিল কল্লোলে কল্লোলে?

তোরে কি ডাকিতেছিল অধীর ঝটিকা  
শ্বসি' বার বার?

করি' ধরা হুলু-হুলু, উপাড়িয়া তরু-মূল,  
ভাঙ্গিয়া সমুদ্র-কূল-করি' হাহাকার?

তোরে কি খুঁজিতেছিল শত চক্ষু দিয়া  
বিহ্বল আকাশ?

ফুল, ফল, লতা, তরু, নদ, নদী, গিরি, মরু-  
জড়িয়ে সমস্ত ধরা মিটে নি পিয়াস?

২

কোথা ছিলি এত দিন? ছিলি কি লুকায়ে  
শারদ জ্যোৎস্নায়?

কোথা ছিলি এত দিন? ছিলি কি বসন্তে লীন?  
ছিলি কি বরষা-প্রাতে, নিদাঘ-সন্ধ্যায়?

কোথা ছিলি এত দিন? ছিলি কি লুকায়ে  
প্রিয়সীর পাশে?

প্রেম-আলিঙ্গন-স্পর্শে, না জানি-কি সুখে হর্ষে,  
ঝাঁপায়ে পড়িলি বুকে সরল বিশ্বাসে!

কিংবা আজীবন এই হৃদয়-ব্রহ্মাণ্ডে  
যে আকুল স্নেহ-

অণু-পরমাণু মত- ঘুরিত রে অবিরত,  
ঘুরে' ঘুরে' এত পরে ধরেছে ও দেহ!

আয় বাছা, কৰ্মক্ষেত্রে মহাজন তুই,  
অতীতে নবীন!

ধরিয়া নূতন কায়া এসেছ মায়েৰ মায়া,  
পুত্র হ'তে ফিৰে' নিতে পূৰ্ব স্নেহ-ঋণ!

আয় বাছা, আমাদেৰ ভাগ্যলিপি তুই,  
দেব-আশীৰ্বাদ!

দেহ যাবে ধরা হ'তে, চির-প্ৰাণ রেখে' তো'তে;  
আয় সান্ত জীবনেৰ অনন্ত আশ্বাদ!

কিংবা সৃষ্টি-আদি হ'তে আজিকে অবধি  
ধৰাৰ ভিতৰ-

যত প্ৰাণ গেছে টুটে', তোমাতে এসেছে ফুটে'-  
মরণ-সাগরে নব-জীবন সুন্দর!

কিংবা ভবিষ্যৎ-গৰ্ভে আছে যত প্ৰাণ,  
রে উষা-আলোক!

তোমারেই কৰে' ভৱ, আসিছে তোমাৰ পৰ-  
বীজে যথা কল্পতৰু, অণুতে ভুলোক!

অনাদি-অনন্ত-ৰূপা মহাকাল-মায়া,  
আয়, বুকুে আয়!

আয় সৃষ্টি-স্থিতি-মূৰ্ত্তি! আয় বিশ্বৰূপা স্ফূৰ্ত্তি!  
কি যত্ন কৰিব তোৰে-স্নেহে না কুলায়!

নমি প্ৰজাপতি-পুণ্য, লক্ষ্মী-স্বৰূপিণী!  
ধন্য কৰ্মভূমি!

ধন্য এ মোহেৰ ঘোৰ- পাপ তাপ দুঃখ মোৰ,  
জীবন-মহন-শেষে এলে যদি তুমি!

এস, তুমি লো প্ৰকৃতি! শক্তি-ৰূপিণীৰে  
ল'য়ে কোলে তৰে!

নিৰুস্প-প্রদীপ-আঁথি-                      জন্ম-জন্ম চেয়ে থাকি,  
দুলুক হৃদয়-পদা প্রেমের প্রণবে!

BANGLADARSHAN.COM



# আদর

[প্রতি শ্লোকের শেষাংশ ছড় হইতে গৃহীত]

বড় দুষ্ট, না-না, যাদু অতি শিষ্ট তুমি!  
আর ফুলায়ো না ঠোঁট, এই মুখ চুমি।  
তোমারে বকিতে পারে হেন সাধ্য কার—  
সসাগরা ধরিত্রীর সম্রাট আমার!

ছাড়,—ছাড়, লক্ষ্মীছাড়া, গৌফগুলো গেল,  
এই লও রাঙ্গা লাঠী, বসে' বসে' খেল'।

খেল', ভদ্র দিগম্বর, লইয়া খেলনা,  
করিব তোমার নামে কবিতা রচনা।  
তুমি নয়নের মণি, বিশ্ব-চরাচর  
তোমার নয়নপাতে কি শুভ সুন্দর!

আলোকে পুলকে ধরা উঠিছে রাঙ্গিয়া—  
ওই যা! বেহালাখানা ফেলিল ভাঙ্গিয়া!

অমরীর কর-চ্যুত তুমি ফুল-ইষু,  
নিষ্কলঙ্ক শাপ-ভ্রষ্ট ক্ষুদ্র দেব-শিশু!  
কত পুণ্যে পাইয়াছি তোরে, প্রাণাধিক!  
রোদনে মুকুতা বরে, হাসিতে মাণিক।  
স্বর্গ-মর্ত্য ভুলে' থাকি তোরে কোলে নিলে—  
দেখ-দেখ, সিকি দুটো ফেলে বুঝি গিলে'!

তুমি বসন্তের ফুল, বসন্তের পিক,  
তোমার সুবাসে গানে মুগ্ধ দশ দিক।  
তুমি দেবতার শ্বাস—মলয় নির্মল;  
তুমি শরতের জ্যোৎস্না—অমরী-অঞ্চল।

ছাড়,—ছাড়, হঁকা ছাড়, কি বিষম টান—  
এই বার লঙ্কাকাণ্ড করে হনুমান!

তুমি অতীতের স্মৃতি, ভবিষ্যের আশা,  
চপল জীবনে তুমি অচল পিপাসা!

দম্পতির নিত্য-নব প্রেম-অনুরাগ  
তোমার সলীল স্পর্শে সতত সজাগ!  
ধর-ধর, হতভাগা কিছু নাহি বুঝে,  
সিঁড়ি হ'তে পড়ে বুঝি ঘাড়-মুখ গুঁ'জে!

দেহ পারিজাতে গড়া, চক্ষে ধ্রুবতারা,  
চরণে ললিত গতি-মন্দাকিনী-ধারা।  
মুখে পূর্ণিমার শশী-কলঙ্ক-বিহীন;  
অধরে অরুণ-হাসি, ভাষে বাজে বীণ।  
পরশে সোহাগ-রাগে রোমাঞ্চ শরীরে-  
কি জ্বালা! চাদরখানা দাঁতে করে' ছিঁড়ে!

তোমারে ধরিতে কোলে, করিতে চুম্বন,  
বাহু বাড়াইয়া আছে দিগঙ্গনাগণ!  
অস্ত যায় রক্তরবি-তবু চায় ফিরে',  
খেলিতে তোমার কম-কমল-শরীরে!

কত গন্ধ, কত গান দেয় বায়ু আনি'-  
কুকুরের কাণ ধরে' এ কি টানাটানি!

ধরণীর সর্ব্ব শোভা করি' আহরণ  
গড়েছে প্রকৃতি তব অপূর্ব্ব গঠন!  
এ কুসুমে সুধা দিতে বিধি দয়াময়  
নিঙ্গাড়িয়া দিয়াছেন স্বর্গ সমুদয়!  
থাকিলে সহস্র প্রাণ দিতাম হেলায়-  
ধর-ধর, ঝুঁকিতেছে ভাঙ্গা জানালায়!

আশীর্বাদ করি, বৎস, যেন চিরদিন  
এমনি সরল থাক, এমনি নবীন!  
বিধাতার আশীর্বাদ, পিতৃবাহু সম,  
চিরদিন আগুলিয়া রাখে, প্রিয়তম!  
পাপ-তাপ দূর করি' চির-পুণ্য-আলো-  
আমি বলি হাত দুটো বেঁধে' রাখা ভালো!

ধনে হও যক্ষরাজ, দাতাকর্ণ দানে,  
বলে হও ভীমার্জুন, বেদব্যাস জ্ঞানে;  
স্বদেশ-সহায় হও, হও পুণ্যশ্লোক,  
ধরণী তোমার নামে চির-ধন্য হোক!

ওগো, খাতাখানা গেছে, কালি দেছে ফেলে’,  
লিখিতে পারি না, তুমি নিয়ে নাহি গেলে।

BANGLADARSHAN.COM

## পূজার পর

কোন মতে ভাঙ্গা ঢোল করি' আহরণ,  
সন্ধ্যায় আহর-অস্তে, বীরমদে মাতি',  
দুলাল, লইয়া লাঠী, ফুলাইয়া ছাতি,  
খুকীরে গর্জিয়া বলে,—‘আরে দুরাত্ন!’  
ভীরু কন্যা বলে,—‘দাদা, নাহি চাহি রণ—’  
ভয়ে শুষ্ক-মুখে বসে ভূমে জানু পাতি’;  
তথাপি নিস্তার নাই, ভূমে মারি’ লাথি,  
বলে পুত্র,—‘মোর হস্তে নিশ্চয় নিধন!’  
না হেরিয়া প্রতিদ্বন্দ্বী, মত্ত রণোন্মাদে,  
দ্বারে শত্রু অনুমানি’ করে মুষ্ঠ্যাঘাত—  
আচম্বিতে করপদে হেরি’ রক্তপাত,  
বীর-সহ সৈন্যগণ উচ্চৈঃস্বরে কাঁদে!  
গৃহিণী দিলেন আসি’ ঘা-কত অবাধে;  
ব্যথায় ফোঁপায় বাছা শুয়ে সারা রাত।

BANGLADARSHAN.COM

# মাণিক

পাঁচ বছরের আমি, হাঁগা বড় মামী,  
আর ক' বছর পরে বড় হ'ব আমি?  
বড় হ'লে দেখো তুমি, আমি ও মহিম  
দু' জনে ঘোরাব সুধু সোনার লাটিম!

ইচ্ছে হয় পাঠশালে যাব, বা যাব না,  
করিবে না 'শ্যামা' আর পিছনে তাড়না!  
বই ছিঁড়ি, কালি ফেলি, হারাই পেন্সিল,  
মারিবে না দাদা আর ঘাড় ধরে' কীল।

দেখো তুমি-বড় হ'লে সুধু খা'ব মুড়ি,  
ওড়াব সকাল হ'তে ছাদে বসে' ঘুড়ি!  
হাত ভাঙ্গি, পা ভাঙ্গি, ছাদ হ'তে পড়ি-

চৈঁচাব না বাবা আর অত রাগ করি'!  
খাই আর না-ই খাই, বড় হ'লে মা-  
জোর করে' ঘাড় ধরে' ভাত খাওয়াবে না!  
কাদা মাখি, ঢেলা ছুঁড়ি, করি মারামারি-  
লাগাবে না ভয়ে কেউ আমাদের বাড়ী।

বড় হ'লে দেখে নিও, পিসিমা কেমন  
মেনিরে তাড়ায় রেগে' যখন-তখন!  
বাবার সোনার সেই বড় চেন দিয়ে,  
মেনিরে ঠাকুর-ঘরে রাখিব বাঁধিয়ে!

বোসেদের বানরটা ধরা যদি যায়-  
লুকায়ে রাখিব, দেখো, বৈঠক-খানায়!  
কাছারীতে গেলে বাবা, বেতে দমাদম,  
লাফাতে শেখাব তারে কতই রকম!

BANGLADARSHAN.COM

রোজ আমি যাত্রা দেব, হনুমান বেড়ে  
লাফাবে, খিঁচোবে, যাবে ছেলেদের তেড়ে!  
রোজ তুমি যাবে, নেবে যা ইচ্ছে, মামী!  
তোমার ও কাকাতুটা, নিয়ে যাব আমি?

BANGLADARSHAN.COM

# বঙ্গভূমি

প্রণমি তোমারে আমি, সাগর-উখিতে  
ষড়ৈশ্বর্যময়ী, অয়ি জননী আমার!  
তোমার শ্রীপদ-রজঃ এখনো লভিতে  
প্রসারিছে করপুট ক্ষুর পারাবার।

শত শৃঙ্গ-বাহু তুলি' হিমাদ্রি-শিয়রে  
করিছেন আশীর্বাদ-স্থির-নেত্রে চাহি';  
শুভ্র মেঘ-জটাজাল দুলে বায়ুভরে,  
স্নেহ-অশ্রু শতধারে ঝরে বক্ষঃ বাহি'।

জ্বলিছে কিরীট তব-নিদাঘ-তপন,  
ছুটিতেছে দিকে দিকে দীপ্ত রশ্মি-শিখা;  
জ্বলিয়া-জ্বলিয়া উঠে শুষ্ক কাশবন,  
নদীতট-বালুকায় সুবর্ণ-কণিকা!  
গভীর সুন্দর-বনে তুমি শ্যামাঙ্গিনী  
বসি' স্নিগ্ধ বটমূলে-নেত্র নিদ্রাকুল!  
শিরে ধরে ফণাচ্ছত্র কাল-ভুজঙ্গিনী,  
অবলেহে পা দু'খানি আগ্রহে শাদ্দুল।

নব-বরষায় চূর্ণ-জলদ-কুস্তল  
উড়িয়ে-ছড়িয়ে পড়ে শ্রীমুখ আবরি'!  
চাতকী ডাকিছে দূরে, শিখিনী চঞ্চল,  
মেঘমন্ড্রে কৃষকের চিত্ত যায় ভরি'।

বিস্তীর্ণ পদ্যার তুমি ভগ্ন উপকূলে  
বসে' আছ মেঘস্তুপে অসিত-বরণা!  
নক্রকুল নত-তুণ্ড পড়ি' পদমূলে,  
তুলি' শুণ্ড করিষূথ করিছে বন্দনা।

BANGLADARSHAN.COM

সরে মেঘ, ফুটে ধীরে বদন-চন্দ্রমা!

বিভোর চকোর উড়ে নয়ন-সোহাগে;  
লুটে ভূমে শ্রীঅঙ্গের শ্যামল সুষমা,  
চরণ-অলঙ্কারাগ তড়াগে তড়াগে।

মূর্তিমতী হ'য়ে, সতী, এস ঘরে ঘরে,

রাখ' ক্ষুদ্র কপর্দকে রাজা পা দু'খানি!  
ধান্য-শীর্ষ স্বর্ণ-ঝাঁপি লও রাজা করে—  
ভুলে' যাই—সর্ব দৈন্য, সর্ব দুঃখ গ্লানি!

ছুটি নবোৎসাহে মাঠে ল'য়ে গাভীদলে,

হিমসিক্ত তৃণভূমি, শুষ্ক পদুদল;  
হরিদ্র ধান্যের ক্ষেত্রে, পীত রৌদ্রতলে  
বিছায়ে দিয়েছ তব সুবর্ণ-অঞ্চল!

কুঞ্জটি-সায়াহে হেরি—মৃগযুথ সাথে

ছুটিছ নির্ঝর-তীরে চকিতা চঞ্চলা!  
মদির মধুক-বনে ম্লান জ্যোৎস্না-রাতে  
ল'য়ে তুমি ঋক্ষশিশু ক্রীড়ায় বিহ্বলা!

নিস্তরু-জয়ন্তী-চূড়ে সান্দ্র অন্ধকার,

কণ্টকী লতায় গেছে গিরিভূমি ভারি';  
গহুরে গহুরে বন্য-বরাহ-ঘৃৎকার,  
বহিছে উত্তর-বায়ু শিহরি' শিহরি'।

হেরি,—তুমি সাশ্রুনেত্রে, অবনত-শিরে

পরিত্যক্ত গ্রামে গ্রামে ভ্রমিছ দুঃখিনী!  
ভগ্নস্তূপে, শিলাখণ্ডে, বিনষ্ট মন্দিরে  
খুঁজিছ পুত্রের কীর্তি—অতীত কাহিনী!

অশোকে কিংশুকে গেছে ছাইয়া প্রান্তর,

পিককণ্ঠ-কলতান উঠে দিকে দিকে;  
চূত-মুকুলের গন্ধে মরুত মস্তুর,  
এস হৃৎ-পদাসনে, সর্বার্থ-সাধিকে!



এস-চণ্ডীদাস-গীতি, শ্রীচৈতন্য-প্রীতি,  
রঘুনাথ-জ্ঞানদীপ্তি, জয়দেব-ধ্বনি!  
প্রতাপ-কেদার-বাঙ্গা, গণেশ-সুকৃতি,  
মুকুন্দ-প্রসাদ-মধু-বঙ্কিম-জননী!

BANGLADARSHAN.COM

# কিসের অভাব

মা, তোর কিসের অভাব বল্?

কেন ঝরিছে নয়নে জল?

কেহ দেছে কাব্য, কেহ গীতিগান,

কেহ দেছে শক্তি-বিশ্বব্যাপী মান,

কেহ দেছে দেহ, কেহ দেছে প্রাণ,

কেহ নেত্র-নীলোৎপল।

কেহ দেছে বেদ, কেহ দেছে মন্ত্র,

কেহ চক্রভেদ, কেহ দেছে তন্ত্র,

কেহ দেছে মূর্তি, কেহ দেছে যন্ত্র,

কেহ রত্ন সমুজ্জ্বল।

কেহ দেছে মঠ, কেহ দেছে স্তূপ,

কেহ দেছে সরঃ, কেহ দেছে কূপ,

কেহ দেছে ধ্যান, কেহ দেছে যূপ,

কেহ দেছে হোমানল।

কেহ দেছে বর্ষা, কেহ দেছে সেতু,

কেহ দেবালয়, কেহ চুড়ে কেতু,

কেহ দেছে তর্ক, কেহ দেছে হেতু,

কেহ পথে তরুদল।

কেহ দেছে হল, কেহ ধনুর্বাণ,

কেহ রণপোত, কেহ বা কামান,

কেহ বা ভেষজ, কেহ বা বিধান,

কেহ গ্রহ-ফলাফল।

উঠ মা-উঠ মা, ফিরা' আঁখি দুটী!

কত স্বর্গ তোর রাঙ্গা পায়ে ফুটি'!

আমরা হেরি না আমাদের ত্রুটী-

পুঠি পর-পদতল।

BANGLADARSHAN.COM

# রবীন্দ্রনাথ

[১২৯৭]

দূরে-মেঘ-শিরে-শিরে পূর্ব আকাশে  
ফুটে স্বর্গরেখা সম প্রভাত-কিরণ।  
তরলতা নতমাথা-ডাকে পুষ্পবাসে,  
বিহঙ্গম কলকণ্ঠে করে আবাহন।  
শিথিল পাণ্ডুর শশী মেঘখণ্ড পাশে,  
পলাইছে নিশীথিনী ধূসর-বরণ।  
ঝরনা ঝরিছে দূরে, বায়ু মৃদু শ্বাসে,  
পাটল তটিনী-বক্ষে আলোক-কম্পন।  
ফুটিছে হিমাদ্রি-শৃঙ্গে হিরণ্য-কুসুম!  
মেখলায় উঠে স্তোত্র উদাত্ত গম্ভীর!  
তীরে তীরে জাহ্নবীর পল্লব-কুটীর-  
অঙ্গনে দোহন-গন্ধ, চূড়ে যজ্ঞ-ধূম!  
অর্ধ-নিদ্রা-জাগরণে ধরা স্বর্গচ্ছবি-  
জীবনে স্বপন-ভ্রম, ফুটে রবি-কবি!

BANGLADARSHAN.COM

# পঞ্চদশ বর্ষ গত

পঞ্চদশ বর্ষ গত।

কে জানে এমন বিধির লিখন-দাসত্বে হইবে রত!  
এত খচমচ এ জমা-খরচ, হিসাব-নিকাশ দায়;  
ব্যাজে, খতীয়ানে, কণ্ঠাগত প্রাণে-জীবন যাপিব হয়!

পঞ্চদশ বর্ষ গত।

কি হ'ল পড়িয়া মাথে হাত দিয়া কাব্য উপন্যাস শত?  
কিবা আজি হয় তদ্বিত প্রত্যয়, কিসে লাগে সে সমাস?  
ফরাসী-বিপ্লব লণ্ড-ভণ্ড সব, রোম-গ্রীস ইতিহাস!

পঞ্চদশ বর্ষ গত।

আজি মনে হয় সেই বিদ্যালয়, প্রিয় সহপাঠী যত;  
সেই ব্যাট বল, ঝাউবৃক্ষতল, কত কথা কাণে কাণে,  
সেই হাসি-খুসি, সেই ঘুসা-ঘুসি, তুচ্ছ দুঃখে অভিমানে।

পঞ্চদশ বর্ষ গত।

ভূস্বামী নবীন আজি গৃহ-হীন, ফিরিছে কাঙ্গাল মত;  
দীর্ঘ মামলায় স্বর্বস্বান্ত হয়, পথে ঘাটে থাকে পড়ি',  
আহার অভাবে ছেলেগুলো যাবে দু' চারি দিবসে মরি'।

পঞ্চদশ বর্ষ গত।

সে রুগ্ন গোপাল দেখিছে খেয়াল, ভারত-উদ্ধার-ব্রত!  
পেটের ব্যথায় এখনো লুটায়, 'অম্বল' বেড়েছে বেশী;  
বকেছে, লিখেছে, চাঁদাও দিয়েছে, হবে ভল্টিয়ার দেশী!

পঞ্চদশ বর্ষ গত।

বুদ্ধিমান্ ননী কয়লার খনি কিনিয়া সর্বস্ব-হত।  
নির্বেদ্য পরাণ, আজি বুদ্ধিমান, ছিল তার অংশীদার,  
বাগিচা কিনিচে, জুড়ি হাঁকাইছে; ননী ট্রাম-কণ্ঠস্টার।

পঞ্চদশ বর্ষ গত।

আজি ভোঁদা হর-রতি-মনোহর, খাঁদা নাক সমুন্নত!  
মৃত শ্বশ্রু তার-তারি অধিকার আজি জমিদারীখানি।

অদৃষ্টের ফের-শ্যাম পণ্ডিতের বিফল ভবিষ্য-বাণী!

পঞ্চদশ বর্ষ গত।

সে শান্ত নিখিল হয়েছে উকীল, মেরুদণ্ড অবনত;  
ট্রামে দেখা হয়, বড়ই সদয়, কথা কয় কাছে আসি’;  
দিন দিন দিন, শামলা মলিন, নাই সে প্রফুল্ল হাসি।

পঞ্চদশ বর্ষ গত।

বিলাতে যাইয়া হাকিমী লইয়া ফিরিয়াছে মন্থমথ!  
যদি দেখা হয় কথা নাহি কয়, চশমায় ঢাকে চোখ,  
চুরট্ টানিয়া, তুড়ি শিশ্ দিয়া, রঙ্গে চঙ্গে কত রোখ!

পঞ্চদশ বর্ষ গত।

সেই ঘনশ্যাম, কিনিয়াছে নাম, জমীজমা কিছু মত।  
দরশনী লয়, তবে কথা কয়, তা’ পরে তামাকু ডাকে,  
প্রেঙ্ক্সন-পানে চেয়ে হুঁকা টানে-যতক্ষণ কিছু থাকে!

পঞ্চদশ বর্ষ গত।

মৃত জগদীশ, গা-ঢাকা সতীশ, শিরীষ সীমান্তে হত;  
ডেপুটী সুরেশ, মাষ্টার নরেশ, পরেশ পোড়ায় পাঁজা,  
কংগ্রেসে হরি, পাশায় ঈশ্বরী, প্যারী থিয়েটারে রাজা।

পঞ্চদশ বর্ষ গত।

ক্ষিপ্ত বনমালী, বিপত্নীক কালী লয়েছে সন্ন্যাস-ব্রত;  
বিধু পদ্য লেখে, নিধু গান শেখে, সিধু পত্র-সম্পাদক;  
যদু জুয়া খেলে’ অধর্মণ-জেলে, মধু ধর্ম-প্রচারক।

পঞ্চদশ বর্ষ গত।

শনিবারে দেশে, সোমবারে এসে মসীযুদ্ধ অবিরত!  
‘মেসে’ থাকি খাই-দালে নুন নাই, ঝোলে মাছ যায় ভেসে,  
কাপড় হারায়, তামাকু ফুরায়, খরচ মেলে না শেষে।

পঞ্চদশ বর্ষ গত।

বরষে বরষে গৃহিণী হরষে প্রসবিছে কন্যা যত!  
তবু নহে ভীত! সর্বস্ব বিক্রীত, ঋণে অন্ধকার হেরি-  
বেয়ানের রাগে প্রাণে ধর্ম জাগে, কমণ্ডলু ল’তে দেরি!

ভাবিতেছি অবিরত,-

কোন্ তপস্যায় লভি পুনরায়, যে বাল্য বিফলে গত!  
দিও বেত্রাঘাত, পড়া শত পাত, সমস্ত জ্যামিতিখান;  
বিনা নেত্রজলে দাঁড়াইব 'হলে', ধরি' নিজ দুই কাণ।

BANGLADARSHAN.COM

## জন্ম ও মৃত্যু

ওই সদ্যোজাত শিশু-বৃত্তচ্যুত ফুল,  
শুইল ধরণী-অঙ্কে হ'য়ে নিদ্রাকুল;  
বারেক মেলিল আঁখি, ফেলিল নিঃশ্বাস-  
কত জন্ম-পরিচয় মুহূর্তে প্রকাশ!

মরণ শিয়রে বসি' গায়ি' মৃদু গান,  
আদরে যতনে দিল ঢাকি' দু' নয়ান!  
শোকে দুঃখে ভূমে পড়ি' মূর্ছিতা জননী-  
শুনিছে কি ধরাপ্রান্তে নূপুরের ধ্বনি!

হে মায়াবী, দাঁড়াইয়া বৈতরণী-কূলে,  
কি ভাবিছ মনে মনে আঁখি দুটা তুলে' ?  
আলু-থালু মতিচ্ছন্না ছুটে উর্দ্ধশ্বাসে-  
কাতর আহ্বান তোর শুনে কি বাতাসে?

BANGLADARSHAN.COM

# শিশু-হারা

১

হা বিধি,

কেন রে করিলি তারে চুরি!

অভাব কি হয়েছিল স্বরগে মাপুরী?

ভরিতে কাহার বুক

হরিলি আমার সুখ!

তার সেই হাসি-মুখ চাঁদে নাহি দিলে-

যেত কি রে সব আলো নিবিয়া অখিলে?

বুকখানা ভেঙ্গে'-চুরে'

কার বুক দিলি জুড়ে'-

আমার সে বুক বাঁধা বাহু দুটা তার?

ছিঁড়েছিল কোন্ শাখা কল্প-লতিকার!

আমারে করিয়া অন্ধ,

কারে দিলি সে আনন্দ?

কোন্ স্বর্ণ-হরিণীর অন্ধ শিশু ছিল-

সেই দুটা টানা চোখে মায়েরে হেরিল!

কোন্ নন্দনের পাশে,

অলস জ্যোৎস্নার হাসে,

কোন্ মন্দাকিনী-স্রোত থেমেছিল ভুলে'-

চলি-চলি চলা তার দিলি কূলে কূলে!

কোন্ অঙ্গুরীর বীণা

হতেছিল সুরহীনা?

দিয়ে তার আধ কথা-নবীন বঙ্কার,

বিষণ্ণ দেবতাকূলে ভুলালি আবার!

২

বাছা রে,

আজি স্বর্ণ-রঙ্গভূমে



কত দেবী তোরে চুমে—  
সে আনন্দ-কোলাহলে খুঁজিস্ কি মোরে?  
পেয়েছে কি হেন কেহ,  
জানে জননীর স্নেহ!  
তেমনি কি ভয়ে-ভুমে নামায় না তোরে?  
  
শত কোলে ফিরে' ফিরে'  
কার কোলে ঘুমালি রে—  
আপন করিলি কারে মায়ে ক'রে পর!  
জীবন-শুশান-কূলে  
বসে' আছি বড় ভুলে'—  
মরণে কাতরে ডাকি জুড়ি' দুই কর—  
আজ তুই কোথা, বাছা, কত দূরান্তর!

BANGLADARSHAN.COM

# বিপত্নীক

বিশাল সংসার সেই পড়ে' আছে, হয়!

সেই দিন যায় ব'য়ে

আলোক-আঁধার ল'য়ে;

একা আছি শূন্যে চেয়ে—এ শূন্য ধরায়!

সে-ই নাই, হয়!

নাই সে উষার হাসি—

প্রভাত-আনন্দরাশি!

নাই সে সন্ধ্যার তারা—বিশ্রাম-আশ্রয়!

নাই সে জীবন-মায়া—

মধ্যাহ্ন-বকুল ছায়া!

কোলে সে সেতার নাই, দেহে সে হৃদয়!

বহিতেছে সেই বায়—

চমকিয়া পায় পায়

ফুলের সুবাস মত কেহ নাহি আসে!

ফুটিতেছে সেই শশী—

জ্যোৎস্না মত খসি' খসি'

গায়ে পড়ে'—বুকে পড়ে' কেহ নাহি হাসে!

সেই উপবন-গায়

সে তটিনী বহে' যায়,

সে প্রমোদ-তরী আর ভেসে না বেড়ায়!

লতা-ফাঁকে, তরু-কোলে

সে জ্যোৎস্না নাহি দোলে!

পথে পড়ে' ফুলরাশি—কে দলিয়া যায়!

সে শয়ন-গৃহ এই,

গৃহে সে আলোক নেই,

আলোকে সে খেলা নেই, খেলায় সে টান!

পালঙ্কের আশে-পাশে

BANGLADARSHAN.COM

সে হাসি আর না ভাসে—  
যবনিকা-অন্তরালে সে মুঞ্চ নয়ান!

কতদিন গেছে চলে’—  
নাহি আর গৃহতলে  
লুপ্তিত-অঞ্চল চিহ্ন, চরণের রাগ।  
নাহি আর এ শয্যায়  
সে রূপ-আভাস, হয়,  
সে পবিত্র দেহ-গন্ধ—সে স্বপ্ন সজাগ!

সে বৈকুণ্ঠধাম মম  
আজি রে শ্মশান সম—  
হানা ঘরে বায়ু যেন ঘুরি হাহা করে’!  
কোণে কোণে জমে ধূলা,  
হেথা-হোথা বইগুলা,  
ছেঁড়া ছবি, ভাঙ্গা বীণা অযতনে পড়ে’।

তার সে মুখর শুক  
পাখায় ঢেকেছে মুখ,  
আদর না পায় কারো—আদর না চায়।  
সাধের শিখীটা তার  
নাচে না নিকুঞ্জ আর,  
সাধের হরিণী তার মরেছে কোথায়!

তার সে আদুরে মেয়ে  
দ্বারে ব’সে পথ চেয়ে—  
ঠোঁটে আর হাসি নাই, মুখে নাই রব!  
কোলে তুলে’ নিতে গেলে,  
অমনি কাঁদিয়া ফেলে—  
ঘরে যেন কেহ নাই, পথে যেন সব!

দাস দাসী পরিজন  
সকলেই ভাঙ্গা মন,  
ফিরিয়া—পলাতে পেলে প্রাণ যেন পায়।

BANGLADARSHAN.COM

আঁধারে দুঃস্বপ্ন মম  
কি দীর্ঘ জীবন মম—  
কারে কি সান্ত্বনা দিব, কে দিবে আমায়!

বুঝেছি কপাল মোর,  
তবু ঘুচে নাই ঘোর—  
ভাবিতে—ভাবিতে কভু সব ভুলে' যাই!  
রজনী গভীরা হেন,  
তবু সে আসে না কেন—  
সহসা চমক ভাঙ্গে, তবু দ্বারে চাই!

আবার মুদিয়া আঁখি  
কত কি ভাবিতে থাকি—  
মৃতেরা এ ধরাতল দেখিতে কি আসে?

কোথা হ'তে সে যদি রে  
সহসা আসিয়া ফিরে—  
আঁখি-যুগ ঢাকে করে, বসে হেসে' পাশে!  
বলে বসে' গতকথা,  
বাঁধে গলে বাহুলতা,  
বলে চুম্বি'—দেহ-অন্তে হইবে মিলন!  
বলিবে কি এখনো রে  
ভুলিতে পারে নি মোরে—  
মরণেও আছে তার জীবন-বন্ধন!

কেবা দেয় সে বিশ্বাস—  
মৃত্যু পরে স্বর্গবাস,  
এ সংসার কৰ্মভূমি—স্বর্গের সোপান!  
পাপ হ'তে কেবা রাখে?  
পুণ্য-পথে কেবা ডাকে?  
কোথা এ দুঃখের শেষ—কোথা ভগবান্!

# মাতৃহীন

জীবনের পঞ্চমাস্ত্রে, হে নট নবীন,  
কি নূতন অভিনয় দেখাইবে আর!  
ঘনায় আসিছে সন্ধ্যা, অদৃষ্ট কঠিন,  
টানিছেন কর্মসূত্র-প্রকৃতি তাঁহার!  
নড়ে নীল যবনিকা, আকাশ মলিন,  
ধূসর ধরণী-পানে চাহি বার বার!  
প্রণয় বন্ধুত্ব স্নেহ-আস্বাদ-বিহীন,  
সুখ দুঃখ পাপ পুণ্য-শূন্য-শূন্যকার!

কেন এ কাতর দৃষ্টি-মায়ার বন্ধন?  
মুমূর্ষু জীবনে তীব্র মদিরা-তাড়না!  
কেন এ অস্ফুট ভাষা-করণ ক্রন্দন?

বিয়োগান্ত নাটকের অব্যক্ত বেদনা!  
কেন এ সরল হাসি, সহাস চুম্বন?  
আবার জাগ্রত-স্বপ্ন-ভবিষ্য কল্পনা!

BANGLADARSHAN.COM

# মাতৃহীনা

ধূলায় বসে' কাঁদিস কেন, আয় রে বাছা, বুকে আয়—  
যেমন ধীরে চাঁদের হাসি পড়ে ভাঙ্গা প্রাসাদ-গায়!  
আয় করুণা, নয়ন মুছে,' বুকে আমার ছুটে' আয়—  
সাঁঝে যেমন দখিণ-বায়ু গহন বনে লুটে' যায়!  
সারাটা দিন আছি বসে' মরুর মতন প্রতীক্ষায়—  
দু'কুল-ভরা নদীর মতন উছলে উছলে আয় রে আয়!

দুলে' দুলে', বাহু তুলে', আয় রে কোলে, মা আমার!  
উথলে' হৃদয় আছড়ে' পড়ুক, ফেলুক ভেঙ্গে' বুকের হাড়!  
পাতলা ঠোঁটে ঠোঁটে-টেপা হাসিটা তোর উঠুক ফুটে'—  
মেঘের কোলে, সাগর-জলে উষার কিরণ পড়ুক লুটে'!  
নিয়ে নূতন দেশের কথা, নূতন রঙ্গে, নূতন নাটে—  
আয় রে ক্ষুদ্র সোনার তরী, আমার ভাঙ্গা বিজন ঘাটে!

কোথা হ'তে সোনার লতা, লতিয়ে লতিয়ে আসিল বুকে—  
রাশি রাশি ফুলের হাসি, ফুলের গন্ধ মাখিয়ে মুখে!  
কচি কচি কৌকড়ান চুল চোখে মুখে ঝাঁপিয়ে পড়ে;  
পাহাড়-পাশে ঝরণা যেন, আছিস বিভোর আপন স্বরে!  
দূর আকাশের স্বপন কত চোখের ভিতর ঘুমিয়ে আছে—  
চাইলে ভয়ে চম্কে পলায় গুস্তারাটা মেঘের কাছে!

বুকে দলি, কোলে তুলি, তবু তিয়াষ নাহি পূরে—  
কোথায় রাখি—কোথায় রাখি, বাঁশী যেন বাজছে দূরে!  
পরাণ-পাখী ছড়িয়ে পাখা কোথায় উড়ে' যেতে চায়—  
কোন স্বরণের শ্যামল রেখা, দূরে ঈষৎ দেখা যায়!  
ঘুমায় নিথর চাঁদের আলো শিবালয়ের স্বর্ণচূড়ে;  
ঘুমের ঘোরে ডাকে কোকিল—কুঞ্জে কুঞ্জে করুণ সুরে।

এসেছিস কি সন্ধ্যাসতী, মরুভূমে রোদের পরে—  
আশার আভাস, স্মৃতির উছাস, প্রেমের সুবাস বুকে করে'!  
শীতের পরে ভাঙ্গা ঘরে এসেছিস কি মধু-রাণী—

কচি দুটী বাহু-লতায় ছাইতে ভাঙ্গা চালাখানি!  
এসেছিস কি শুকো দেশে নূতন ভাঙ্গা-মেঘের রাশি!  
তুই কি আমার উঠিস ফুটে' বাদলা-মেঘে উষার হাসি!

সেই হাসিটী, সেই দিঠিটী, একটু যেন মধুর বেশি!  
একটু বেশি আকুল-ব্যাকুল, একটু অধিক মেশামেশি!  
তেমনি অধর একটুকুতেই মানের ভরে কতই রাঙ্গা-  
অশ্রুভরা নয়ন দুটী, শ্বাসে বচন ভাঙ্গা-ভাঙ্গা!  
আয় রে গত-সুখের স্বপন, সাঁঝের মেঘে সোনার হাসি-  
জীবন-ভরা নবীন হৃদয়, কানন-ভরা কুসুমরাশি!

মায়ের আমার কতই আশা ফুটত নিত্য আমায় হেরে'-  
সকল দুঃখে আড়াল দিয়ে, জীবনখানি ছিলেন ঘেরে'!  
হাতটী স্নেহে দিতেন মাথায়, কতই স্বস্তি অধীর শ্বাসে,  
সদাই যেন হারান-হারান, কি হয়-কি হয় ব্যাকুল ত্রাসে!

আমায় রেখে' যাবেন কিসে, ভেবে' হ'তেন পাগল-পারা;  
ঠাকুর-ঘরে পড়ে' পড়ে', কেঁদে' কেঁদেই হ'তেন সারা!

ছিল আমার দুখের ঘরে-সুখের চির-মধুর হাসি,  
সরল লজ্জা, কোমল ব্যঙ্গ, গভীর ভালবাসা-বাসি!  
নিত্য নূতন কতই যতন, কতই সোহাগ, সাধা-সাধি!  
হাসির চেউয়ে দুল্ছে হৃদয়, বাইরে তবু কাঁদাকাঁদি!  
সব কথাটা বলতে গিয়ে আধেক কথায় থেমে যাওয়া;  
হারিয়ে দিয়ে কেঁদে' আকুল, হেরে' গিয়ে হেসে' চাওয়া!

তোমার মতন কেউ রে বাছা, চেউয়ের মতন আসে নাই-  
কূল-কিনারা ভাসিয়ে দিয়ে কেউ রে এমন হাসে নাই!  
আলো-মাখা বৃষ্টির মতন কেউ রে এমন কাঁদে নাই!  
মালার মতন শতেক পাকে কেউ রে এমন বাঁধে নাই!  
জ্যোৎস্নার মতন ভাঙ্গন ঢেকে' কেউ রে বুকে দোলে নাই!  
উষার মতন নয়ন মেলে' স্বপন-জগৎ খোলে নাই!





শুদ্ধ শান্ত সতী-

কি স্নেহ-আকুল প্রাণে            চাহে তোমাদের পানে  
সজল নয়নে!

অধরে কম্পিত হাস,            অশ্রুত আশিস্-ভাষ!  
প্রণম' দু' জনে!

বাঁধিতে নূতন ঘর            যাও, বাছা, অতঃপর!  
বাঁধ' বুকে বল।

লও সুখ, লও সাধ,            লও পিতৃ-আশীর্বাদ  
ভরিয়া আঁচল।

লও নিত্য নব আশা            জগজনে ভালবাসা  
পূরিয়া হৃদয়!

লও তৃপ্তি, লই শান্তি!            রেখে' যাও ভুল, ভ্রান্তি,  
দুঃখ সমুদয়।

BANGLADARSHAN.COM

# সংসারে

কোথা হে জগৎ-পিতা! ডাকি হে কাতরে—  
দলিত মথিত আমি সংসার-সমরে!  
নিত্য এই পরাজয়-দীনতার মাঝে,  
বল, তব শুভ ইচ্ছা সতত বিরাজে!  
এ জীবন কাল-রাত্রি—বল বল, নাথ,  
অদূরে রয়েছে চির-বসন্ত-প্রভাত!  
এ ভীষণ ভূমিকম্প-ধরা বিদারিয়া,  
বল, কত স্বর্ণখনি দিবে দেখাইয়া!  
প্রলয়-সাগরোচ্ছ্বাসে বৃথা ভয় গণি,  
বল, দিবে কূলে আনি' কত মুক্তামণি!

BANGLADARSHAN.COM

# বালবিধবা

হারায়েছে পতি          নবম বরষে,  
বিবাহের প্রায় দু' মাস পরে।  
লোকে বলে তার          কি পোড়া কপাল,  
এমন স্বামী কি অকালে মরে!

বিবাহের কিছু          মনে নাহি পড়ে,  
মনে পড়ে দূরে বাজিছে বাঁশী-  
উঠানে উঠিছে          কল কল রব,  
ছুটাছুটি করে সকলে হাসি'।

কখন অলস মনেতে          ভাবিতে ভাবিতে  
স্বপনের মত চমকে প্রাণে-

চেয়ে আছে যেন          দুটী টানা চোখ,  
অতি শ্রান্ত হ'য়ে চোখের পানে!

কখন ঘুমাতে ঘুমাতে          উঠে চমকিয়া,  
কে যেন হাতটী ধরিল আসি'-

চারি দিকে চায়,-          কেহ কোথা নাই,  
বিছানায় কাঁপে চাঁদের হাসি।

কখন ভোরেতে সহসা          উঠে শিহরিয়া,  
কে যেন ঈষৎ চুমিল তায়-

চারি দিকে চায়-          কেহ কোথা নাই,  
বহে পরিমল-শীতল বায়।

কেমন সারাটা সকাল          উদাস হৃদয়,  
সব কাজে যেন করিছে ভুল-

গাছের তলায়          কি ভেবে' দাঁড়ায়,  
তুলিতে আসিয়া পূজার ফুল!

কেমন সারাটা দুপুর          কাটিয়া কাটে না,  
বসিয়া বসিয়া নদীর তীরে-

BANGLADARSHAN.COM

উড়ে' যায় চিল,            ভেসে' যায় মেঘ,  
ডিঙ্গি বেয়ে গেয়ে জেলেরা ফিরে।

কেমন সাঁঝের সময়            চোখে আসে জল,  
কোলে পড়ে' মালা-কি ভেবে সারা!  
বার বার চায়            আকাশের পানে,  
উঠিয়াছে কি না সাঁঝের তারা।

বসন্তে কেমন            ভেঙ্গে' পড়ে বুক  
আলোকে জগৎ গিয়াছে পূরে'!  
সবাই বলিছে            আসিছে-আসিছে,  
কোথা তুমি, নাথ, জগৎ দূরে!

বরষায় হৃদি            অতি গুরুভার,  
মেঘে মেঘে গেছে আকাশ ভরি'-  
এস গো স্বামিন্-            এস গো বাহিয়া  
মরণ-সাগরে সোনার তরী!

এস তুমি নাথ,            জন্মান্তর-ছায়া,  
বারেক দেখিব নয়ন ভরি'!

বারেক কাঁদিব            চরণে পড়িয়া-  
যে দুটা চরণ স্বপনে গড়ি।

BANGLADARSHAN.COM

# হেমচন্দ্র

[১৩১০]

হে কবি, হে পূজ্য কবি, চির-দুঃখিনীর

ভক্তিমান্ কীর্ত্তিমান্ কৃতজ্ঞ সন্তান!

অন্ধ নেত্র-আজীবন ঢালি' নেত্রনীর-

ত্রীতদাসী জননীর হেরি' অসম্মান!

অক্ষরে অক্ষরে তব হৃদয়-রুধির

কি গৌরবে মহাযজ্ঞে করিছে আহ্বান

নিরাশা নির্ভীক আজ-বিশ্বাস গভীর,

অন্ধ বর্তমান হেরে ভবিষ্য মহান্!

হে দরিদ্র, একদিন ক্ষোভে শোকে দুখে

আলোড়িলে জীবনের উদ্দেশ্য অতল!

হে জয়ন্ত, তব যশোমুকুট-ময়ূখে

জটিল কর্তব্য আজ সরল উজ্জ্বল!

স্বর্ণ-সিংহাসনে নৃপ দু' দিন জীবনে-

চির-প্রতিষ্ঠিত তুমি বঙ্গ-হৃদাসনে!

BANGLADARSHAN.COM

# ঈশানচন্দ্র

মথিয়া কবিত্ব-সিন্ধু বঙ্গ-কবিগণ

লইল বাঁটিয়া সুধা, অমরা-বিভব।

রঙ্গলাল নিল শশী-নির্মাল কিরণ

নিল ঐরাবতে মধু-দ্বিতীয় বাসব;

হেম নিল উচ্চৈঃশ্রবা-গতি অতুলন,

নবীন ধরিল বক্ষে কৌস্তভ দুর্লভ;

বিহারী-করণা-লক্ষ্মী-করণ-লোচন,

রবি নিল পারিজাত-ত্রিদিব-সৌরভ।

তুমি মস্তনের শেষে আসিলে, যোগেশ,

উঠিল তোমার ভাগ্যে ভীষণ গরল!

কালকূট-কটুগন্ধে সৃষ্টি হয় শেষ,

সুর নর যক্ষ রক্ষঃ আতঙ্কে বিহ্বল!

প্রজাপতি যুক্তকর-রক্ষ' বিশ্ব-প্রাণ,

মূর্তিমান্ প্রেম-মন্ত্র-সাক্ষাৎ ঈশান!

BANGLADARSHAN.COM

# নিত্যকৃষ্ণ বসু

[১৩০৭]

হে নিত্য, অনিত্য সব-সকলি দু' দিন!

সেই প্রেম-প্রীতি-স্নেহ-করণ অন্তর,

দারিদ্র্যের মৃদু গর্বে চরিত্র সুন্দর,

স্বভাবে সরল অতি, কর্তব্যে প্রবীণ।

ধীর ভাষা, স্থির আশা, জ্ঞান সর্বাঙ্গীণ,

সংসারের সুখে দুঃখে সদা অকাতর;

জীবন-পাবন-যজ্ঞে মগ্ন নিরন্তর-

হৃদয়ে অজেয় বীর, বিশ্বে উদাসীন।

হে সুহৃদ, গেলে কোন্ মানসের তীরে

নবীন প্রভাতে ল'য়ে নব জাগরণ!

রঞ্জিত দু'খানি পাখা পরাগে শিশিরে,

নয়নে জড়িত স্বপ্ন, মুখে গুঞ্জরণ!

বাণীর চরণ-পদু ঘিরে' ঘিরে' ঘিরে'

করিতে জীবন-গীতি পূর্ণ সমাপন।

BANGLADARSHAN.COM

# হরিদাস বন্দ্যোপাধ্যায়

[১৩০৫]

কোথায় সে দেশ-তুমি যেতেছ যেথায়?

জীবনের পরপারে-রবি-শশী দূরে!

প্রেম প্রীতি স্মৃতি ধ্যান যায় কি সেথায়?

বাজে কি হৃদয় আর জগতের সুরে?

হাসিয়া কাঁদিয়া মোরা দু' দিন হেথায়-

আবার কি মিলি সবে সে অমর-পুরে?

এমনি কি শোকে দুঃখে স্নেহে মমতায়

প্রিয়জনে ধরি' বুকে সুখ-অশ্রু ঝরে?

যাও-তবে যাও, সখা, তুমি নিজ ঘরে!

কত বসন্তের গান, শরতের মেঘ,

কত-না বিফল স্বপ্ন-কল্পনা-উদ্বেগ

ছুটিছে তোমার পিছে কাঁদিয়া কাতরে!

গেছে-যাবে কত মাতা, কত শিশু, নারী-

দু' দিনের আগুপিছু,-মিছে নেত্রবারি।

BANGLADARSHAN.COM



# সন্ধ্যায়

স্নেহময়ী মাতা ওই দিবা-অবসানে,

চঞ্চল বালকে তাঁর, দুটী হাতে ধরি’,

কত ছলে, কত বলে, কত স্নেহে, মরি,

পথ হ’তে ল’য়ে যান নিজ গৃহ পানে!

যায় শিশু-চায় পিছে কাতর নয়ানে-

কত সাধ, কত আশা, কত ধূলা পড়ি’!

বাধে পদ, উঠে দুঃখে কাঁদিয়া গুমরি’,-

‘মা গো, আর কিছুক্ষণ খেলি এইখানে!’

হা প্রকৃতি-জননী গো! জীবন-সন্ধ্যায়

ওই মূঢ় শিশু সম, না বুঝে’ তোমার

স্নেহ-আকর্ষণে-ভাবি মরণ-তাড়না!

পলাইতে তোমা হ’তে পড়িয়া ধূলায়

আঁকড়িয়া ধরি বুকে ধূলার সংসার-

রোগ, শোক, হাহাকার, অভাব, লাঞ্ছনা!

BANGLADARSHAN.COM

# শুশান-প্রান্তে

কত দেহ হইয়াছে ভস্ম এ শ্মশানে—

কে জানে!

যেতে এই পথ দিয়া—আকুলিয়া উঠে হিয়া

বার বার ফিরে' চাই দূর গ্রাম পানে!

জ্বলিতেছে চিতানল, কাঁদিছে বাতাস;

তটিনী আকুল স্বরে তটে এসে শুয়ে পড়ে;

ম্লান শশী, ছিন্ন মেঘে স্তম্ভিত আকাশ।

কত গৃহ, কত মুখ মনে যেন পড়ে!

আর নাহি চলে পদ—স্নেহে-প্রেমে গদ-গদ,

কত-না অজানা স্বর ডাকিছে কাতরে।

এ কি জীবনের ব্যাখ্যা—মরণের পথে!

দেখি নি—ভাবি নি কভু, এত ভালবাসা তবু

জীবনে মরণে আছে জড়িয়ে জগতে!

BANGLADARSHAN.COM

# প্রার্থনা

ভগবন্-ভগবন্ এই শেষ নিবেদন  
চরণে তোমার-  
করেছি অনেক পাপ, সহেছি অনেক তাপ  
লইয়া সংসার।

এই মায়া মোহ ক্লেশ এইখানে হোক শেষ,  
তুমি যেন আর-  
একটি একটি করি', ন্যায়-তুলাদণ্ড ধরি'  
ক'রো না বিচার!

আজি-বহু দিন পরে ভ্রান্ত পুত্র ফেরে ঘরে,  
তুমি পিতা তার-  
সব অপরাধ ভুলে', লও-লও বুকে তুলে'  
আগ্রহে আবার!

BANGLADARSHAN.COM

## প্রভাতে

বুঝিতে পারি না আমি এ খেলা কেমন!

চিরদিন ধরি-ধরি,

খুঁজিয়া-খুঁজিয়া মরি,

সেই এই-এই করি' যাবে কি জীবন?

উদ্বেল সাগর মত

আশা-ভালবাসা যত

উছলিবে অবিরত বিরহে কেবল?

কোথা সে পূর্ণিমা-চাঁদ

পেতেছে প্রেমের ফাঁদ-

কেন এ হৃদয়-বাঁধ সদা টল-টল?

কার ঘরে কার হাস

করে' আছে মধুমাস-

আমি কেন ফেলি শ্বাস শীত-কুয়াশায়?

কোথা রূপে ঢলাঢলি,

কোথা প্রেমে গলাগলি-

আমি কেন দুখে জ্বলি' কাঁদি নিরাশায়?

মেঘের ঘোমটা খুলে'

চায় উষা নদীকূলে,

আমি কেন ভাবি ভুলে'-সে চাহিছে বুঝি!

অলক্ষ্যে পোহায় নিশি-

আলোকিত দশ দিশি,

লাগিয়া-জগতে মিশি' দেহে প্রাণে যুঝি!

কাঁপে বায়ু ফুলবাসে,

মনে হয় সে নিঃশ্বাসে-

কাছে বুঝি আসে-আসে-চমকিয়া উঠি!

তরুতলে পড়ে' ছায়া,  
মনে হয় তার কায়া—  
গিয়া দেখি আলো-মায়া-মিছা ছুটাছুটি।

শুনি দূরে ডেকে' কা'য়,  
কে কেঁদে চলিয়া যায়—  
কাছে গিয়া দেখি, হয়, বহে নির্ঝরনী!  
কাহারো নাহিক দেখা,  
কূলে নাহি পদ-রেখা—  
আমি সুধু ঘুরি একা, কোথা বিরহিণী!

কোথা তুমি, কত দূরে,  
কোন্ সুর-অন্তঃপুরে—  
স্বর্ণমেঘ ঘুরে' ঘুরে' রাখে কি আড়ালে?

ফুলে ছেয়ে দেছে দিক্,  
গাছে গাছে ডাকে পিক,  
কত শশী অনিমিত্ত চায় চন্দ্রবালে!

আমি দুখে অভিমানে,  
চাহিয়া আকাশ পানে,  
বুথায় কাতর প্রাণে ডাকি কি তোমায়?

সজল নয়ন-আগে  
কেন ইন্দ্রধনু-রাগে  
তোমার বদন জাগে স্বপ্ন-সুষমায়!

তুমি কি জীবনে ভুলে'  
কখন গবাক্ষ খুলে'  
দেখ নি বাতাসে দূলে কত দীর্ঘশ্বাস—  
কত শোভা, কত গন্ধ,  
কত সুর, কত ছন্দ,  
কি যন্ত্রণা, কি আনন্দ, কি চির-বিশ্বাস!

কোন্ জন্মে, কোন্ লোকে  
দেখেছি সহস্র চোখে—

BANGLADARSHAN.COM

এস গো বিরহ-শ্লোকে মিলন-আশ্বাস!  
ছায়া পিছে কায়া নিয়ে  
আজীবন ছুটি, প্রিয়ে,  
হৃদয়ে হৃদয় দিয়ে কর দেহ নাশ।

BANGLADARSHAN.COM

# মধ্যাহ্নে

১

একেলা জগৎ ভুলে পড়ে' আছি নদীকূলে,  
পড়েছে নধর বট হেলে' ভাঙ্গা তীরে;  
ঝুরু-ঝুরু পাতাগুলি কাঁপিছে সমীরে।

চাতক কাতরে ডাকে, চরে বক নদী-বাঁকে,  
ডাকে কুবো কুব্ কুব্ লুকায়ে কোথায়!  
গাভী শুয়ে তরুতলে, হংসী ডুবে উঠে জলে,  
ডিম্বাখানি বেঁধে কূলে জেলে ঘরে যায়!

দূরেতে পথিক দুটী চলে' যায় গুটি-গুটি,  
মেঠো পথ দিয়া।

পাশ দিয়া ল'য়ে জল, আঁখি দুটী চল-চল,  
কুলবধু দ্রুত গেল লাজে চমকিয়া।

BANGLADARSHAN.COM

নিঝুম মধ্যাহ্ন-কাল, অলস স্বপন-জাল  
রচিতেছি অন্যমনে হৃদয় ভরিয়া!

দূর মাঠ পানে চেয়ে, চেয়ে-চেয়ে, সুধু চেয়ে  
রয়েছি পড়িয়া!

ধূ-ধূ ধূ-ধূ করে মাঠ, ধূ-ধূ-ধূ আকাশ-পাট,  
পড়িয়া ধূসর রৌদ্র পরিশ্রান্ত মত!

হু-হু হু-হু বহে যায়— ঝাঁপাইয়া পড়ে গায়,  
কোথাকার কথা যেন ল'য়ে আসে কত!

হৃদয় এলায়ে পড়ে যেন কি স্বপন-ভরে!  
মুদে' আসে আঁখি-পাতা যেন কি আরামে!

অন্য মনে চাহি' চাহি'— কত ভাবি, কত গাহি!  
পড়িছে গভীর শ্বাস-গানের বিরামে।

খসে' খসে' পড়ে পাতা, মনে পড়ে কত গাথা—  
ছায়া-ছায়া কত ব্যথা সহি ধরাধামে!

# অপরাহ্নে

শুনি নাই কার কথা,                      বুঝি নাই কার ব্যথা—

এত কাব্যে, এত গাথা-গানে!

দেখি নাই কার মুখ—                      এত সুখ, এত দুখ,

এত আশা, এত অভিমানে!

এ জীবনে পূরিত সকল,

সে যদি গৌ আসিত কেবল!

গানে বাকি সুর দিতে,                      ফুলে বাকি তুলে নিতে,

স্বপ্ন বাকি হইতে সফল—

সে যদি গৌ আসিত কেবল!

অযতনে ব্যর্থ হয় সবি!

ধরিয়া তুলিটা সুধা                      দুটা রেখা টেনে' গেলে—

শূন্য হৃদি, হ'য়ে যেত ছবি!

কি কথা বলিতে হ'বে                      একবার ব'লে গেলে—

লক্ষ্য-হারা, হ'য়ে যেত কবি!

কোথা তুমি ফুটিয়াছ ফুল

এ শুষ্ক তরুর!

কোথা তুমি বহিছ তটিনী,

এ তপ্ত মরুর!

যুথীর শীতল মৃদু বাস,

বায়ু সুধু আনিছে হেথায়

কার মুখ চুমি'!

কে আছ—কোথায় আছ তুমি!

বিহঙ্গম ডাকে যে প্রত্যাষে,

ডাকে সে কি বৃথায়—বৃথায়!

ফুটে না কি প্রভাত-আলোক,

সে ডাক্ কি শূন্যে ভেসে যায়!

জীবনের এই আধখানা,



দরশ-পরশাতীত আশা-

এ রহস্যে কোন অর্থ নাই?

এ কি সুধু ভাবহীন ভাষা!

এ কি সুধু ভাবহীন ভাষা-

এই কথার পিছে প্রাণান্ত-পিপাসা!

এই যে আঁখির কাছে কত অশ্রু ফুটে আছে,

কি আশা নিঃশ্বাস পিছে অবিরত যুঝে-

এই বুক-ভরা ব্যথা কেহ নাই বুঝে?

এই যে নীরব প্রীতি- শারদ জ্যোৎস্নার স্মৃতি,

আপন হৃদয়-ভারে ব্যথিত আপনি-

বাজিছে বাঁশরী দূরে করণ পুরবী সুরে,

এই আছে, এই নাই-উছলিছে ধ্বনি-

এই যে আকুল শ্বাসে- জগৎ মুদিয়া আসে,

অথচ জানি না নিজে কি দুঃখে বিহ্বল-

কিছু নয়-কিছু নয় তবে এ সকল?

এই যে নদীর কূলে পলে পলে ঘুরি ভুলে',

আগ্রহে তরণ তলে চাহি কার তরে-

গাঁথিয়া ফুলের মালা খেলে না কি কোন বালা,

চাহে না পথিক পানে সন্ধ্যায় কাতরে!

ওই কুটীরের দ্বারে, এ ভাঙ্গা বেড়ার পারে

কেহ কি বসিয়া নাই মোর অপেক্ষায়?

চমকি' উঠিলে বায়ু চমকিয়া চায়!

আসে যায় কত লোক, কাহারো সজল চোখ

পড়িবে না মোর চোখে, হ'বে না মিলন-

এ জীবন-হেঁয়ালির চরণ-পূরণ!

ঘনায় আসিছে সন্ধ্যা, স্তব্ধ বনভূমি;

সোণালী মেঘের গায়ে, সুরভি-শীতল বায়ে,

শিথিল তটিনী-ভঙ্গে লুকালে কি তুমি!

পিক-কণ্ঠে, মৃগ-নেত্রে, কম্পিত শ্যামল ক্ষেত্রে,

মুদ্রিত কমল-পত্রে রয়েছ কি ঘুমি'!  
আকুল হৃদয় কাঁদে, কোথা তুমি-তুমি!

ছাড়া-ছাড়া হ'য়ে কেন বেড়াইছ ভাসি'?  
ভাগিয়া স্বপন-কারা সম্মুখে আসিয়া দাঁড়া-  
নয়ন পলক-হারা, মুখে ভরা হাসি!  
নাহি কথা, নাহি ব্যথা- কি গভীর নীরবতা!  
হৃদয়ে হৃদয় পড়ে উচ্ছ্বাসি'-উচ্ছ্বাসি'!

BANGLADARSHAN.COM

# সায়াহে

মলয়-সমীর,  
মৃদু মৃদু, ঝুরু-ঝুরু, মেদুর, অধীর!  
কত দূর হ'তে এস বহিয়া,  
তাহার পরশ-বাস লইয়া!  
নাহি জানি সে কোন্ জগতে—  
হৃদয়ের পরতে পরতে  
পড় তুমি লুটিয়া!  
স্বরগে মরতে ভেদ—                      বিরহের দীর্ঘচ্ছেদ  
যাক্ যাক্ টুটিয়া!

পূর্ণিমা রজনী,  
জ্যোৎস্নায় ভরিয়া গেছে সমস্ত ধরণী।

অদূরে পুলকে পিক কুহরে,  
ফুলে ফুলে তরলতা শিহরে;  
নয়ন আলসে ঢুলু-ঢুলু,  
কূলে নদী বহে কুলু-কুলু;  
ওই দূরে নীপ মূলে                      তাহার আঁচল দুলে—  
কত হয় ভুল!  
ভুলি' বিশ্ব-চরাচর                      আগ্রহে বাড়াই কর—  
হৃদয় আকুল।

আধ ঘুমে, আধ জাগরণে—  
কতই—কতই ভাবি মনে!  
সে যেন ব্যাকুল হ'য়ে,                      সেই ভালবাসা ল'য়ে,  
আছে কাছে বসি'!  
সারা রাত—সারা রাত                      বুলাইতে দেহে হাত  
নিঃশ্বসি' নিঃশ্বসি'!

আধ-আধ স্বপ্ন-ভরে                    কভু কর পড়ে করে,  
প্রাণে পড়ে প্রাণের নিঃশ্বাস-  
শিরায় শোণিত-ধারা                সুরে তালে দেয় সাড়া,  
হৃদে হৃদি-জীবনে বিশ্বাস!

BANGLADARSHAN.COM

# প্রদোষে

রজনী রে,  
কি কাব্য লিখিছ তুমি তারকা-অক্ষরে,  
আকাশের পরে!  
সারা রাত চেয়ে থাকি ওই শূন্য পানে  
নিশ্চল নয়ানে।  
যেই আশা, যে পিপাসা,  
যেই ভাষা, ভালবাসা  
বুঝিতেছি মর্মে মর্মে স্বপনে সঙ্গীতে—  
কথায় না ধরা যায়,  
বুঝাতে না পারি, হয়,  
চারি চারি ভিতে!

সেই কথা, সেই ব্যথা,  
সে আকুল-নীরবতা,  
সেই সুখ, সেই মুখ, বায়ু ঢুলু-ঢুলু,  
নদী কুলু-কুলু,  
সেই পরিচিত ঘর,  
সেই প্রিয়জন, পর,  
সেই ফুল, সেই ভুল, বিরহ মিলন,  
সেই হাসি, সেই বাঁশী, কল্পনা স্বপন,—  
সেই চোখে ঘোর-ঘোর,  
সেই প্রাণে ভোর-ভোর,  
অক্ষরে অক্ষরে তোর কেমনে উছলে  
এ আকাশ-তলে!

BANGLADARSHAN.COM

# নিশীথে

১

আজি নিশি জ্যোৎস্নাময়ী, সৌরভে আকুল বায়,  
দুলে' দুলে' স্রোতস্বিনী কূলে কূলে বহে' যায়।  
চোখে আসে ঘুম-ঘোর, মন কি ভাবিতে চায়—  
আধেক গৈঁথেছি মালা, আর নাহি গাঁথা যায়!  
সমীরণে ভেসে' আসে সুদূর অঙ্গুরা-গান—  
অলস স্বপন সম ছায়িতেছে মনঃপ্রাণ!  
এই জীবনের পারে, এই স্বপনের শেষে,  
কে যেন আমার আছে জীবন্ত কল্পনা-বেশে!  
উড়ে কেশ বায়ু-ভরে, ছল-ছল দু' নয়ান,  
বুকে উছলিছে প্রেম, মুখে কত অভিমান!

২

কোথা তুমি—কোথা তুমি—জন্ম-জন্মান্তর মায়া—  
স্মৃতিময়ী, প্রীতিময়ী, গীতিময়ী সেই কায়া!  
নন্দনে—মন্দার-কুঞ্জে মন্দাকিনী-তীরে বসি',  
অন্যমনে দেখিছ কি নীল নভে পূর্ণশশী!  
করে মৃগালের ডোর, কোলে পারিজাত-রাশি,  
বাতাসে বিরহ-গীতি ক্ষণে ক্ষণে আসে ভাসি'!  
ধীরে ধীরে ঝরে অশ্রু, পড়ে শ্বাস গুরু-ভার—  
চাহিছ কাতর-দৃষ্টে ধরা পানে বার বার!  
কারে কি বলিতে ছিল—অভিশাপে ছিল ভুলি',  
জ্যোৎস্নায় সৌরভে গানে—দূর-স্মৃতি উঠে দুলি'!

৩

পৃথিবীর শত দুঃখে হৃদয় শতধা চুর,  
কেঁদে' কেঁদে' ক্লান্ত হ'য়ে দেখিছে স্বপন দূর—  
মেঘেদের আঁকা-বাঁকা পথ যেন দিয়ে দিয়ে,  
অবশেষে পৌঁছিয়াছে মন্দাকিনী-তীরে গিয়ে!  
দূর হ'তে দেখিতেছে করুণ দৃষ্টিটা তব—

পলকে পলকে ফুটে কত শোভা নব নব!  
জান আর নাহি জান, শত বাহু বাড়াইয়া—  
আকুলি' ব্যাকুলি' হৃদি তোমারে ডাকিছে, প্রিয়া!  
তরঙ্গে তরঙ্গে বিশ্ব—আলোকে আঁধারে মেলা,  
ছায়া নিয়ে—মায়া নিয়ে এ জীবন-প্রেমখেলা!

৪

দাঁড়াও, অভেদ আত্মা! পরলোক-বেলাভূমে,  
বাড়িয়ে দক্ষিণ-কর মৃত্যুর নিবিড় ধূমে!  
জগতের বাধা-বিঘ্ন জগতে পড়িয়া থাক্,  
নীরবে সৌন্দর্য্য-মাঝে কবিত্ব ডুবিয়া যাক্!  
দেখেছি তোমার চোখে প্রেমের মরণ নাই,  
বুঝেছি এ মরভূমে মত্ত ব্রহ্মানন্দ তা-ই!  
তারকায় তারকায় হা-হা করে' তোমা তরে  
ছুটিতে না হয় যেন আবার মরণ-পরে!

এ মৃত্যু কি শেষ মৃত্যু—যন্ত্রণার অবসান?  
ধর এ জীবনাহুতি—বিরহের শেষ গান!

॥সমাপ্ত॥